

Sqarim : shkrim i botuar dt 22.01.2011 nga Zeri Popullit. Redaksite e gazetave te tjera nuk e botuan.

## **NGUSHËLLIME PËR FAMILJET E TË VRARËVE NË PROTESTËN E 21 JANARIT 2011 DHE RIKUJTESË KRYEMINISTRIT SALI BERISHA**

Në emër të Kryesisë së Shoqatës Bregdeti, dhe popullatës autoktone të zonës turistike Vlorë-Saradë, shprehim keqardhejen tonë të thellë dhe ngushëllime familjeve të tre shtetasve që u vranë në protestën e datës 21Janar 2011, para godinës së Kryeministrisë.

I rikujtojmë zotit Sali Berisha se pas dhunës që ndërlikoi protestën e datës 21 Janar 2011, ju u shprehët se jeni « i përcaktuar për të zbatuar ligjin, ligjin dhe vetëm ligjin ». Pikërisht Kushtetutën dhe ligjin në përputhje me kushtetutën, ju kemi kërkuar e me dhjetra e dhjetra kërkesa që ju kemi drejtuar. Në media u deklarua që ditën e Mërkurë dt. 26 Janar 2011, ju do të organizoni një manifestim. Me bindjen se ju e lexoni rregullisht edhe gazetën e opozitës « Zëri Popullit » dhe e keni lexuar kërkesën tonë të fundit që është botuar në këtë gazetë me datë 21 janar 2011, ju kërkojmë që para këtij manifestimi të na përgjigjeni për kërkesat tona që kemi bërë publike në shkrimin e datës 21 janar 2011. Do të ishim të kënaqur që këtë kërkesë ta publikonte të plotë dhe gazeta e maxhorancës Rilindja Demokratike, që në fakt vazhdimisht refuzon botimin e shkrimeve tona, ku ne kritikojmë shkeljen e kushtetutës dhe grabitjen me ligj të pronave tona të trashëguara. Të shpronësuarit që kërkojnë pronën e tyre të trashëguar që ju vazhdoni të ja mohoni, janë populli, pjesë e elektoratit të majtë dhe elektoratit të djathtë.

Për këto tre jetë të humbura si dhe dhjetra të plagosur si nga protestuesit dhe nga policia, ne mendojmë se përgjegjëse është anarkia institucionale dhe politika e këtyre 20 vjetëve. Kjo anarki institucionale, që ka filluar pas vitit 1991, përfshin disa mijëra të vrarë e të plagosur për pronën e tyre të trashëguar, për shkak se ju si Kryeministër dhe drejtues i maxhorancës po vazhdoni të pengoni kthimin e pronës tek i zoti. Ju dhe askush tjetër nuk keni të drejtë të na mohoni pronën tonë të trashëguar dhe nuk keni të drejtë të deklaroni se jetojmë në një shtet demokratik për sa kohë nuk keni bërë një ligj, që të zbatojë të drejtën e pronësisë në përputhje me detyrimet kushtetuese të vitit 1991 dhe Kushtetutën e vitit 1998 në fuqi.

Nga Kryesia e Shoqatës « Bregdeti »